

Penulis perlu cintakan ilmu dan mutu, kata Mahathir

KUALA LUMPUR, Ahad — Datuk Seri Dr Mahathir berkata, sasterawan tempatan boleh menjadi penulis yang berkualiti jika mereka dipupuk dengan sikap cintakan ilmu pengetahuan dan mutu kerana mutu semata-mata, dan bukan kerana 'komersialisme'.

"Selagi kita berdalih untuk mempertahankan kelemahan-kelemahan kita, selama itulah kita tidak dapat menghasilkan sesuatu yang baik kerana kita sentiasa mengejar impian dan ingin menjadi orang lain, bukan diri sendiri yang bermaruah dan berkemampuan," kata Perdana Menteri di majlis pelancaran *Zamalah Sastera Berita Harian*, di sini malam ini.

Bellau berkata, wujudnya golongan intelek dan penulis tidak semestinya menentukan kesan yang bernilai, membina, sihat dan berkesan kepada masyarakat.

"Ini adalah disebabkan ilmu pengetahuan mempunyai asas falsafahnya, dan asas falsafah inilah yang mencorakkan bentuk penekanan dan kesan hasil intelektual dan penulisan di dalam sesuatu masyarakat," ujarnya.

Menurutnya, falsafah yang mempunyai arah bagi membina masyarakat yang sihat, dengan perselariannya di kalangan berbagai-bagai golongan di dalam masyarakat — pemerintah, cendekiawan dan karyawan serta rakyat

— akan mengukuhkan asas dan jentera bagi pembentukan identiti dan nilai kenegaraan serta nilai hidup anggota masyarakat.

Bagi kita sekarang, ujarnya, soal pertama ialah apakah kita sebagai anggota masyarakat Malaysia telah menghayati semua aspek falsafah negara Malaysia yang maju, moden dan bermaruah.

Datuk Seri Dr Mahathir berkata, dalam zaman moden, sistem komunikasi menjadi alat pembentukan masyarakat yang penting, dan para intelek dan penulis menjadi golongan penting yang menggerakkan dan mempengaruhi sistem itu.

Dikuasai

Ini bererti pemikiran dan masa depan sesuatu masyarakat, dengan langsung dan tidak langsung, dikuasai oleh para intelek dan penulis.

"Oleh itu, soal kedua ialah sejauh mana para intelek dan penulis dapat menguasai bidang-bidang ilmu pengetahuan tertentu yang dapat membantu mereka membuat sumbangan yang maksimum kepada masyarakatnya."

Menurutnya, akhirnya ini konsep multi-disiplin atau inter-disiplin ditekankan kerana penggunaan sesuatu disiplin ilmu pengetahuan tidak boleh menjadikan seseorang sebagai manusia yang lengkap.

"Tetapi, apa konsep sekalipun tidak dapat

menjamin pengetahuan yang menyeluruh kecuali seseorang itu mempunyai minat dan cintakan ilmu pengetahuan," tegasnya.

Perdana Menteri berkata, perkara yang ketiga ialah cara penyampaian sesuatu penulisan mestilah menggunakan bahasa yang mudah.

"Kalau bahasa menjadi alat perantara antara manusia, bahasa yang mudah tentulah menjadi alat penyambung yang paling luas," katanya.

Malangnya, tambah beliau, di dalam masyarakat kita ada golongan yang seolah-olah bersekolah di sekolah bahasa yang kononnya tinggi tetapi sukar difahami untuk menyampaikan hasil pemikiran mereka.

Menyentuh tentang kecaburan pendapat mengenai seni, Datuk Seri Dr Mahathir berkata, ada di kalangan penulis yang sanggup berdalih dengan hujah-hujah yang lemah bagi mempertahankan mutu seni dan mutu sastera yang lemah.

Pendapat setengah pihak kononnya hasil sastera dan filem tempatan tidak bermutu kerana mereka tidak dapat memasukkan unsur-unsur yang dapat menghairahkan, seperti babak-babak seks, bukan sahaja dapat mempengaruhi pemikiran peminat seni tetapi memesongkan hakikat sebenarnya bahawa mutu sesuatu hasil seni tidak bergantung kepada unsur seks, ujarnya.